



31. August 2026

UKA 2026/342

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Silassorissuusiaq atorlugu nipilersukkanik, assilialianik eqqumiitsulianillu allanik pilersitanik tamanut saqqummiussinermi ersarissumik nalunaaqutseruisarnissaq, nalunaarsuisarnissaq aammalu kalaallit eqqumiitsuliortuisa pisinnaatitaaffiisa qanoq pitsaanerpaamik illersorneqarsinnaaneratt pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Aqqalu C. Jerimiassen, Atassut)

Piffissamiippugut silassorissuusiap ulluinnarni annertusiartuinnartumik atorneqalerfigisaanut killilluta. Silassorissuusiaq nutserinermut, paasissutissanik ujarlernermet, assinik ilusilersuinermet, nipinik aaqquissuinermet, nipilersuusiornermut, allannermut allarpassuarnullu atorneqarsinnaalersimavoq. Ineriartorneq unitsinneqarsinnaanngilaq, eqqortumillu atorneqartilluni inuiaqatigiinnut annertuumik iluaqutaasinnaavoq.

Taamaakkaluartoq ineriartornitsinni killissarititaasussanut, akisussaaffitsigut aammalu pinngorartitsisunik illersuineq pillugit apeqqutinik pingaarutilinnik pilersitsivoq. Immikkoortinneqarsinnaasariaqarpormi suna inuup nammineq pinngorartitsineratigut pilersinneqarsimanersoq, sunalu silassorissuusiaq ikiortigalugu suliarineqarsimanersoq, aammalu suna tamakkiisumik imaluunniit annertuumik silassorissuusiamit pilersinneqarsimanersoq ilisimassallugu.

Ullumikkut silassorissuusiaq atorlugu sivikitsuinnarmik ilitserorneqarnikkut erinarsuut, taalliaq, nipilersuut, assilialiaq imaluunniit allatut "eqqumiitsuliaq" pilersinneqarsinnaavoq. Tamatuma kingorna pilersitaq inuup nammineq suliaatut saqqummiunneqarsinnaavoq, naak nipilersugaq, taallartai, nipaa, assilialiarineqarnera imaluunniit ilusilersorneqarnera silassorissuusiamit annertuumik pilersinneqarsimagaluartut. Atassummiit isumaqarpugut tamanna tusarnaartunut, isiginnaartunut aammalu eqqumiitsuliortunut ammasumik nalunaarutigineqartariaqartoq.

Silassorissuusiap atortorissaarutitut atorneqarnissaa inerteqqutigineqartariaqanngilaq. Nipinik suliaqarneq, teknikkikkut pitsanngorsaanerit, nutserineq, isumassarsianik ineriartortitsineq imaluunniit eqqumiitsuliortup nammineq suliaani ikorfartuineq tamakkiisumik silassorissuusiamit pinngortitsinermiit allaaneruvoq. Taamaattumik silassorissuusiamik ikiorserneqarluni suliaqarneq imaluunniit tamakkiisumik annertuumilluunniit silassorissuusiamit pilersitaq immikkoortinneqarsinnaasariaqarput.



Koda-p malittarisassaani aamma taakku immikkoortinneqarput. Inuit namminneq annertuumik pinngorartitsinermikkut peqataaffigisaat silassorissuusiamik ikiorserneqarluni suliaasutut nalilerneqarsinnaapput. Nipilersuut imaluunniit taallartaa tamakkiisumik silassorissuusiamit pilersitaasimappat, silassorissuusiamit pilersitaasoq immikkut nalunaarsorneqassaaq, taassumalu silassorissuusiamit pilersitaasup nammineq Koda-mit akissarsissutigineqarnissaa pisinnaanngilaq. Tamanna takutitsivoq silassorissuusiaoq atorlugu suliaqarnerup qanoq nalunaarsorneqarnissaa pillugu tunngavissanik peqareertoqartoq.

Nunani allani aamma ersarissumik nalunaaqutsersuisarnerit eqqumaffigineqarneqalersimapput, EU-mi silassorissuusiaoq pillugu malittarisassat silassorissuusiamit pilersitanik nipinik, assinik, videonik allatigullu imarisassanik paasineqarsinnaasumik nalunaaqutsersuisarnissamik piumasaqaateqarput. YouTube-p aamma silassorissuusianit pilersitaasumik nipilersuut imarisaqartillugu ikkussisup tamanna nalunaarutigisarnissaa piumasaqaatigaa. Nunatsinni malittarisassat qanoq ilusilerneqarsinnaanersut misissorneqartariaaqarpoq, EU-p malittarisassai Nunatsinnut toqqaannartumik atuuttanngimmata isumassarsiorfigineqarsinnaaneri eqqarsaatigalugit.

Nunatsinni nipilersortartut, erinniortut, taalliortut, nipilersuusiortut, assinik ilusilersuisartut, grafikerit, assiliisartut, filmiliortut aammalu eqqumiitsuliortut allat ukiuni amerlasuuni piginnaasaminnik ineriartortitsillutik annertoorujussuarmik suliaqartarput. Taakku suliaat akuersissuteqaqqaarnani silassorissuusiaoq atorlugu ilarneqartarneri ullumikkut tusarsaasalereerput, piginnittussaaitaaneq, eqqumiitsuliortup kinaassusaa aammalu aningaasatigut tunngavii ulorianartorsiortinneqarput.

Inuup nipaani isikkuanik imaluunniit eqqumiitsuliornermini ilisarnaataanik silassorissuusiaoq atorlugu akuersissuteqaqqaarnani ilaarsineq immikkut aamma isiginiarneqartariaaqarpoq. Tusarnaartup saqqummersitaq eqqumiitsuliortumit ilisimaneqartumit pilersitaasorisinnaavaa, naak eqqumiitsuliortoq akuersisimanngitsoq suliaqarnermulluunniit peqataasimanngikkaluartoq. Taamaattumik inuit nipaasa, isikkuisa, aqqisa aammalu eqqumiitsuliornikkut ilisarnaataasa illersorneqarnissaat pisariaqarluinnarpoq.

Aamma pisortat suliffeqarfiutaasa, Namminersorlutik Oqartussat kommunillu silassorissuusianik pilersitanik assinik, nipilersuutinik imaluunniit ilusilersukkanik nittarsaassinerminni atuinerat pillugu ataatsimoorussanik malittarisassaqaarnissaaq eqqarsaatigineqartariaaqarpoq. Pisortat periarfissaqarnerat peqqutigalugu Nunatsinni eqqumiitsuliortunik grafikerinillu sulisoqartitsinngitsoortarnissaat imaluunniit silassorissuusiamit pilersitat inuit suliaattut saqqummiunneqarnissaat mianersuutigineqartariaaqarpoq. Pisortat suliffeqarfiutaat ammasumik paasissutissiisarnissamut aammalu Nunatsinni pinngorartitsisartunik tapersersuinissamut maligassiutinissaat pissusissamisoortariaaqarpoq.



Atassummiit isumaqarpugut Naalakkersuisut Koda Kalaallit Nunaat, eqqumiitsuliortut peqatigiiffii, Tusass Music, KNR, tusagassiortut, kulturikkut ingerlatsiviit aammalu naleqquttut allat suleqatigalugit silassorissuusialq pillugu nunatsinni pissutsit misissortariaqaraat.

Siunissaq pissanganartoq ornipparput, silassorissuusiallu eqqortumik atorneqarnermini inuiaqatigiinnut iluaqutissartai annertoqaat. Ineriartornerli ammasuunissamik, akisussaaffimmik aammalu inuit namminneq pinngorartitsinerannik ataqqinninnermik ilaqartariaqarpoq. Atassummi silassorissuusialq inerteqqutigineqarnissaa anguniinngilarput. Anguniarparput inuit ilisimatinneqarnissaat suna inuup pilersitarineraa, aammalu suna silassorissuusiamit pilersitaasimanersoq, aammalu Nunatsinni eqqumiitsuliortutta pisinnaatitaaffii, kinaassusiisa aningaasatigullu tunngavissaasa illersorneqarnissaat.

Taamatut oqaaseqarluta oqalliseqataanissatsinnut qilanaarluta.